

Na osnovu člana 33. Zakona o zdravstvenom osiguranju ("Službene novine Federacije BiH", broj 30/97 i 7/02) i čl. 22. i 24. stav 1. Zakona o Vladi Kantona Sarajevo ("Službene novine Kantona Sarajevo", broj 24/03 - Prečišćeni tekst) a na prijedlog Upravnog odbora Zavoda zdravstvenog osiguranja Kantona Sarajevo, Vlada Kantona Sarajevo, na 37. sjednici održanoj 22. novembra 2007. godine, donijela je

UREDBU

O OBIMU, UVJETIMA I NAČINU OSTVARIVANJA PRAVA OSIGURANIH LICA NA KORIŠĆENJE ORTOPEDSKIH I DRUGIH POMAGALA, ENDOPROTEZA, STOMATOLOŠKO-PROTETSKE POMOĆI I STOMATOLOŠKO-PROTETSKIH NADOMJESTAKA

I - OSNOVNE ODREDBE

Član 1.

Predmet Uredbe

(1) Ovom Uredbom određuju se obim, uvjeti i način ostvarivanja prava na korišćenje ortopedskih i drugih pomagala, endoproteza (u daljnjem tekstu: pomagala), stomatološko-protetske pomoći i stomatološko-protetskih nadomjestaka (u daljnjem tekstu: stomatološko-protetska sredstva), koja se osiguranim licima Zavoda zdravstvenog osiguranja Kantona Sarajevo (u daljnjem tekstu: Zavod), obezbjeđuju po osnovu obaveznog zdravstvenog osiguranja.

(2) Obim prava iz stava (1) ove Uredbe određuje se jedinstvenom listom pomagala, endoproteza i stomatološko-protetskih sredstava u kojoj su utvrđeni vrsta, standardi za materijal od koga se izrađuju i rokovi trajanja ovih pomagala, endoproteza i sredstava.

Član 2.

(1) Prava iz člana 1. ove Uredbe osigurana lica ostvaruju na teret sredstava Zavoda, u skladu sa Zakonom o zdravstvenom osiguranju ("Službene novine Federacije BiH", broj: 30/97 i 7/02), propisima donijetim na osnovu tog zakona, te pod uvjetima i na način utvrđen ovom Uredbom i drugim općim aktima Zavoda, ako međudržavnim ugovorom nije drugačije propisano.

Član 3.

Način propisivanja pomagala

(1) Pomagala, odnosno stomatološko-protetska sredstva, propisuje na osnovu medicinskih indikacija ovlašteni doktor medicine - specijalista određene grane medicine i ovlašteni doktor stomatologije - specijalista određene grane stomatologije, a na osnovu doktrinarnih kriterija).

(2) Listu ovlaštenih ljekara iz stava (1) ovog člana utvrđuje Upravni odbor Zavoda, uz prethodnu saglasnost ministra zdravstva Kantona Sarajevo.

Član 4.
**Definicija pomagala odnosno stomatološko -
- protetska sredstva**

(1) Pomagala koja se ovom Uredbom osiguravaju osiguranim licima Zavoda smatraju se medicinskim proizvodima koji omogućavaju poboljšanje oštećenih funkcija, odnosno nedostataka organa i sustava organa, a koje su nastale kao posljedica bolesti ili ozljede.

(2) Pomagala iz stava (1) ovog člana moraju biti projektovana, proizvedena, instalirana, održavana i upotrijebljena prema propisanim uvjetima i za namjenu za koju su proizvedena, tako da ne ugrožavaju zdravlje korisnika. Projektovanje i proizvodnja tih pomagala mora se provoditi uz obezbjeđenje primjene tehničkih propisa o bezbjednosti proizvoda na tržištu, primjenu kodeksa dobre proizvodne prakse (GMP) kao i kodeksa dobre laboratorijske prakse (GLP), te ista moraju nositi oznaku ili potvrdu o usklađenosti (CE) sa zahtjevima i direktivama Evropske unije, te razvrstana i registrovana u skladu sa Pravilnikom o medicinskim pomagalima ("Službene novine Federacije BiH", br. 58/06 i 24/07).

Član 5.
Prava osiguranih lica

(1) Osigurana lica prema ovoj Uredbi imaju pravo na:

- a) ortopedska i druga pomagala,
- b) popravak pomagala,
- c) rezervne dijelove pomagala (gdje je to propisano),
- d) potrošni materijal za pomagala (gdje je to propisano).

Član 6.
Korištenje pomagala

(1) Pomagala se osiguranim licima daju, u pravilu, na upotrebu uz obavezu vraćanja Zavodu, ako ovom Uredbom nije drugačije propisano.

(2) Izuzetno, osigurano lice nema obavezu vraćanja pomagala koja se izrađuju po mjeri, te ona koja ne mogu biti predmet ponovne upotrebe, osim u slučaju ako su ostala neiskorištena (npr. pelene, jednokratni kateter i slično).

(3) Kada iz bilo kojeg razloga prestane potreba za korištenjem pomagala, ona moraju biti vraćena Zavodu.

(4) Osigurano lice, osoba koja se o njoj stara, odnosno potpisnik na potvrdi o pomagalu, obavezan je, u skladu sa stavom (3) ovog člana, vratiti pomagalo u roku od 30 dana po dobijanju novog pomagala ili nakon prestanka upotrebe, odnosno potrebe za korištenjem.

(5) Osigurano lice koje je propustilo postupiti u skladu sa stavom (4) ovog člana, ne može ostvariti pravo na novo istovrsno pomagalo u roku propisanom za odnosno pomagalo.

Član 7.
Rok upotrebe

(1) Osigurano lice koje, u skladu sa odredbama ove Uredbe, ostvari pravo na pomagalo, ima pravo i obavezu koristiti to pomagalo u roku propisanom za njegovu upotrebu (rok upotrebe), ako ovom Uredbom nije drugačije propisano.

(2) Ako osigurano lice namjerno ili zbog nepažnje uništi, odnosno pokvari pomagalo, gubi pravo na popravak istog, te ne može ostvariti pravo na istovrsno pomagalo do isteka propisanog roka upotrebe.

Član 8.
Upotreba korištenih pomagala

(1) Osigurano lice, u pravilu, ima pravo na novo pomagalo.

(2) Iznimno, osiguranom licu se odobrava već korišteno, ali obnovljeno i servisirano pomagalo koje ima sve odlike funkcionalnosti i kvaliteta kao novo pomagalo, i to:

- a) invalidska kolica kada se koriste za privremenu upotrebu,
- b) štake i hodalice kada se koriste za privremenu upotrebu,
- c) četverouporišni štap kada se koristi za privremenu upotrebu,
- d) antidekubitalni madrac,
- e) slušni aparat (bez olive koja se izrađuje individualno).

(3) Pomagalo iz stava (2) ovog člana osigurano lice je obavezno vratiti Zavodu nakon prestanka upotrebe u skladu sa članom 6. ove Uredbe.

(4) Pomagalo čija je upotreba ostvarena u dvostruko dužem roku od propisanog, a koje je vraćeno Zavodu, Zavod će povući iz daljnje upotrebe.

Član 9.
Obrasci za propisivanje pomagala

(1) Prava propisana ovom Uredbom osigurana lica ostvaruju na osnovu obrasca prijedloga o potrebi pomagala koje Zavod dostavlja ovlaštenim ljekarima specijalistima sa liste ovlaštenih ljekara.

(2) Ovlašteni ljekar dužan je na svaki obrazac naljepiti dodijeljenu ličnu šifru u obliku bar koda.

(3) Samo prijedlozi ovlaštenih ljekara izdati na propisanim obrascima i uz šifru ljekara, moći će se realizovati na teret sredstava obaveznog zdravstvenog osiguranja.

(4) Ovlaštenom ljekaru za kojeg se utvrdi da je osiguranom licu propisao pomagalo suprotno odredbama ove Uredbe, Zavod može uskratiti pravo daljnjeg propisivanja pomagala na teret sredstava Zavoda. Tako izdata potvrda smatra se nevažećom u smislu ove Uredbe.

II. UVJETI I NAČIN OSTVARIVANJA PRAVA NA POMAGALA

Član 10.

Uvjeti za sticanje prava na pomagala

(1) Osigurano lice stiče pravo na pomagalo pod uvjetom prethodnog obaveznog zdravstvenog osiguranja u Zavodu zdravstvenog osiguranja Kantona Sarajevo u trajanju od najmanje 6 mjeseci neprekidno, odnosno 9 mjeseci sa prekidima, u posljednje dvije godine prije nastanka potrebe za pomagalom, ako međudržavnim ugovorom nije drugačije propisano.

(2) Djeca do navršenih sedam godina života ne moraju ispunjavati uvjet prethodnog osiguranja.

Član 11.

Učešće u nabavci pomagala standardnog kvaliteta

(1) Osiguranom licu Zavod osigurava pomagalo odgovarajućeg standarda i kvalitete iz člana 4. ove Uredbe u vrijednosti utvrđenoj ugovorom sklopljenim s ugovornim dobavljačem kao izabranim ponuđačem po okončanom postupku javne nabavke.

(2) Zavod će najkasnije u roku od 15 dana po svakom pravosnažno okončanom postupku javne nabavke u "Službenim novinama Kantona Sarajevo" objaviti visinu svog učešća u nabavci pomagala, pojedinačno za svako pomagalo sa jedinstvene liste, zavisno od ugovorene cijene sa izabranim dobavljačem. Obavijest sa vrijednošću učešća Zavoda u troškovima nabavke pomagala predstavlja sastavni dio ove Uredbe i ista važi do svake nove nabavke odnosno nove obavijesti.

(3) Ako osigurano lice nabavi pomagalo veće vrijednosti od propisane stavom (1) ovog člana, razliku u cijeni pomagala snosi lično.

(4) Ako osigurano lice nabavi pomagalo kod dobavljača sa kojim Zavod nema zaključen ugovor, troškove nabavke snosi u cijelosti, uz mogućnost refundacije sredstava do iznosa cijene koju plaća Zavod za predmetno pomagalo.

Član 12.

Finansiranje dodatnih prava za pomagala

(1) Za pojedine kategorije osiguranih lica kojima je posebnim propisima utvrđen veći nivo prava od prava utvrđenih ovom Uredbom, razliku sredstva za finansiranje dodatnih prava obezbjeđuje nadležni organ koji je utvrdio veći nivo prava.

Član 13.
Potvrda o pomagalu

- (1) Izdavanjem potvrde o potrebi pomagala iz člana 9. ove Uredbe, ovlaštteni ljekar potvrđuje da osigurano lice na osnovu medicinske indikacije ostvaruje pravo na propisano pomagalo u skladu sa odredbama ove Uredbe.
- (2) Osigurano lice obavezno je izdatu potvrdu jo pomagalu ovjeriti u poslovnici Zavoda u roku od 30 dana. Ovjerena potvrda vrijedi 30 dana od dana ovjere, u kom roku je osigurano lice istu obavezno realizovati odnosno izvršiti nabavku ili naručiti pomagalo.
- (3) Potvrdu o pomagalu ovjerava ovlaštteni radnik Zavoda odmah nakon što je utvrdio da osigurano lice ispunjava uvjete za propisano pomagalo utvrđeno ovom Uredbom. Ako je za ovjeru potvrde potrebno prethodno odobrenje stručnog medicinskog lica Zavoda, ovjera se vrši najkasnije u roku od 5 dana.
- (3) Ako osigurano lice ne nabavi ili ne naruči pomagalo u propisanom roku ili ovjerenu potvrdu ne može iskoristiti iz bilo kojeg razloga (npr. gubitak, neupotrebljivost zbog oštećenja i slično), obavezno je dostaviti novu potvrdu na ovjeru Zavodu, a neiskorištenu na poništenje, te u slučaju njenog gubitka dati pisanu izjavu ovjerenu kod nadležnog općinskog organa, pod materijalnom i krivičnom odgovornošću da potvrdu nije iskoristilo, što ovlaštteni radnik Zavoda unosi u evidenciju.

Član 14.
Obaveza vođenja evidencije o pomagalima

- (1) Odobrenom pomagalu, rezervnom dijelu, potrošnom materijalu, izvršenoj popravci, te svim ostalim podacima u vezi s odobrenim pomagalom, Zavod vodi evidenciju u koju se također unosi i podatak o osporenom pravu na pomagalo uz obaveznu naznaku razloga neodobravanja pomagala.
- (2) Ovjerena potvrda o pomagalu ne isključuje odgovornost ovlaštenog ljekara koji je propisao pomagalo, za štetu učinjenu osiguranom licu, odnosno Zavodu, ako se u postupku kontrole pokrenute po službenoj dužnosti ili na prijedlog osiguranog lica utvrdi da je osiguranom licu odobreno pomagalo ili količina pomagala za koje ono ne ispunjava medicinske indikacije ili se utvrdi da ono funkcionalno ne zadovoljava potrebe osiguranog lica.

Član 15.
Prava osiguranih lica na pomagala u bolnici

- (1) Osiguranom licu koje se nalazi na bolničkom liječenju ili bolničkoj medicinskoj rehabilitaciji, zdravstvena ustanova obavezna je osigurati sva potrebna pomagala i potrošne medicinske materijale neophodne u procesu liječenja odnosno medicinske rehabilitacije.
- (2) Tokom prve bolničke medicinske rehabilitacije nakon ozljede, bolesti ili amputacije, ovlaštteni doktor odgovarajuće specijalnosti u nadležnoj bolničkoj zdravstvenoj ustanovi, obavezan je u najkraćem mogućem roku osiguranom licu, a prema medicinskim indikacijama utvrđenim ovom Uredbom, propisati sva potrebna pomagala radi provođenja protetičke opskrbe nužne za provođenje medicinske rehabilitacije.

(3) Ovlašteni doktor odgovarajuće specijalnosti u nadležnoj bolničkoj zdravstvenoj ustanovi obavezan je najmanje 7 dana prije otpusta sa bolničkog liječenja osiguranom licu prema medicinskim indikacijama utvrđenim ovom Uredbom, propisati sva potrebna pomagala koja će koristiti po izlasku iz bolničke zdravstvene ustanove.

(4) Indicirana pomagala obavezno se navode u otpusnom pismu, kako bi ovlašteni ljekar primarne zdravstvene zaštite nastavio propisivati pomagala za koja je prema popisu pomagala ovlašten.

Član 16.

Funkcionalnost pomagala

(1) Individualno izrađena ili prilagođena pomagala obavezno se primjenjuju osiguranom licu uz nadzor ovlaštenog ljekara koji je propisao predmetno pomagalo i koji je obavezan dati ocjenu funkcionalnosti pomagala neposredno prilikom isporuke pomagala osiguranom licu.

(2) Odabrani dobavljač pomagala (proizvođač) obavezan je uz fakturu koju dostavlja Zavodu za naplatu, dostaviti i ocjenu funkcionalnosti pomagala iz stava (1) ovog člana.

Član 17.

Korištenje pomagala prije isteka roka upotrebe

(1) Osiguranom licu Zavod može, u izuzetnim slučajevima, i prije isteka propisanog roka upotrebe ranije odobrenog pomagala, odobriti nabavku novog istovrsnog pomagala ili njegovog dijela, zbog promjene zdravstvenog stanja osiguranog lica, a po nalazu ovlaštenog ljekara, kao i u slučaju da je pomagalo, također po nalazu ovlaštenog ljekara, neupotrebljivo zbog nastalih anatomskih, fizioloških odnosno funkcionalnih promjena, a iste nisu posljedica nekorištenja pomagala odnosno korištenja pomagala na nepropisan način.

Član 18.

Prigovor na isporučeno pomagalo

(1) U slučaju pismenog prigovora osiguranog lica na isporučeno pomagalo koje se izrađuje po mjeri, koji se može podnijeti u roku od 5 dana od prijema pomagala, Zavod formira komisiju koju čine ljekar specijalista odgovarajuće specijalnosti, odabrani dobavljač spornog pomagala i zaposlenik Zavoda, koja u prisustvu osiguranog lica donosi konačnu ocjenu o ispravnosti i funkcionalnosti pomagala, najkasnije u roku od 10 dana od podnošenja prigovora.

(2) Odabrani dobavljač obavezan je, u slučaju da se utvrdi osnovanost prigovora, otkloniti utvrđene nedostatke a troškovi njihovog otklanjanja terete onoga za koga komisija utvrdi da je odgovoran za nastali nedostatak.

(3) Ukoliko se utvrdi da je odabrani dobavljač odgovoran za nedostatke, a isti su takve prirode da se ne mogu otkloniti, dobavljač je obavezan isporučiti novo istovrsno pomagalo na svoj teret.

Član 19.

Specifične medicinske indikacije i pravo na pomagalo

- (1) U slučaju specifičnih medicinskih indikacija osiguranom licu se izuzetno može odobriti određeno ortopedsko pomagalo u zavisnosti od njegovog zdravstvenog stanja i oboljenja, a koja nisu predviđena ovom Uredbom, a ista su mu neophodna za kvalitetniji život.
- (2) Odobrenje pomagala u slučaju iz stava (1) ovog člana odobrava komisija koju formira Zavod i koju čine specijalisti odgovarajuće grane medicine.
- (3) Uz zahtjev za odobrenje pomagala iz stava (1) ovog člana, osigurano lice je dužno dostaviti medicinsku dokumentaciju sa detaljnim obrazloženjem medicinske indikacije, koju daje isključivo ovlašteni ljekar određene specijalnosti koji je i preporučio predmetno pomagalo.

Član 20.

Odobrenje veće količine pomagala

- (1) U slučaju potrebe za većom količinom određenog pomagala od propisane ovom Uredbom, koju utvrđuje ovlašteni ljekar određene grane specijalnosti, osigurano lice podnosi zahtjev komisiji iz člana 19. ove Uredbe.
- (2) Uz zahtjev za odobrenje veće količine pomagala iz stava (1) ovog člana, osigurano lice je dužno dostaviti medicinsku dokumentaciju sa detaljnim obrazloženjem potrebe za povećanom količinom pomagala koju daje isključivo ovlašteni ljekar.

Član 21.

Vrijeme zadržavanja pomagala

- (1) Osiguranom licu oboljelom od paraplegije ili kvadriplegije, koje zbog zdravstvenog stanja trajno koristi određena pomagala (kateteri, pelene, urostomi, urin vrećice i slično), Zavod može odobriti navedena pomagala u količini potrebnoj za tri mjeseca, a na osnovu prijedloga ovlaštenog ljekara porodične medicine, pod uvjetom da se pravo ne ostvaruje prvi put.
- (2) U periodu od 7 dana prije isteka perioda od tri mjeseca od dana prijema pomagala i najkasnije 7 dana nakon isteka tog perioda, osigurano lice može podnijeti novi prijedlog ovlaštenog ljekara za predmetna pomagala, radi utvrđivanja prava za naredna tri mjeseca.

Član 22.

Rok korištenja pomagala odnosno stomatološko-protetskih sredstava

- (1) Rokovi trajanja pomagala odnosno stomatološko-protetskog sredstva, utvrđeni u članu 23. ove Uredbe računaju se od dana uručivanja pomagala odnosno ugrađivanja stomatološko-protetskog sredstva.

III. JEDINSTVENA LISTA POMAGALA, STOMATOLOŠKO-PROTETSKIH SREDSTAVA, MEDICINSKE INDIKACIJE, ROKOVI KORIŠTENJA

Član 23.

Vrste i rok korištenja pomagala i stomatološko-protetskih sredstava

(1) Osiguranim licima, po osnovu obaveznog zdravstvenog osiguranja, u Zavodu se obezbjeđuju, u medicinski indiciranim slučajevima, sljedeća pomagala, endoproteze i stomatološko-protetska sredstva:

Red.		Rok korištenja
Br.	Naziv pomagala	u mjesecima

1. Proteze za gornje ekstremitete

- a) šaka,
- b) podlakatna,
- c) exartikulacija lakta,
- d) nadlakatna,
- e) exartikulacija ramenog zgloba.

Rok trajanja:

- a) za lica do 18 godina 12
- b) za lica od 18-26 godina 24
- c) za lica preko 26 godina 48

2. Proteze za donje ekstremitete

- a) djelimična amputacija stopala,
- b) proteza stopala,
- c) potkoljena,
- d) exartikulacija koljenog zgloba,
- e) natkoljena,
- f) exartikulacija zgloba kuka.

Rok trajanja:

- a) za lica do 18 godina 12
- b) za lica od 18-26 godina 24
- c) za lica preko 26 godina 36

Indikacije za redne brojeve 1. i 2.:

- 1) Protetska sredstva (proteze) služe za funkcionalnu i estetsku zamjenu izgubljenih dijelova ekstremiteta.
- 2) Uz protezu za gornji ekstremitet osigurano lice dobija kao terminalni nastavak funkcionalnu kuku ili estetsku šaku.
- 3) Kod djelimične amputacije stopala odobravaju se i ortopedske cipele.
- 4) Osiguranom licu, kojem je uz ličnu doplatu, izrađena proteza iznad standarda koji obezbjeđuje Zavod (silikonska proteza sa lajnerom) može se u toku korištenja proteze odobriti do dva lajnera, kao potrošni materijal. Prvi lajner može se odobriti nakon jedne godine korištenja proteze, kada Komisija Zavoda utvrdi daje osiguraniku izrađena silikonka proteza sa lajnerom.

3. Navlaka za bataljak (6 komada) 12**4. Silikonska čarapa 6**

Utvrđivanje prava na silikonske čarape isključuje pravo osiguranog lica na navlake za bataljak.

5. Aparati za gornje ekstremitete

Udlaga ili splint za ručni zglob od plastične mase ili metala sa vještačkom kožom

Indikacije:

- a) trajno oštećenje radijalnog nerva ili pripadajuće grupe mišića,
- b) teška artroza ručnog zgloba,
- c) stanja poslije loše sraslih fraktura (pseudoartroza).

Rok trajanja:

- a) za lica do navršениh 7 godina 10
- b) za lica od 7 - 18 godina 12
- c) za lica preko 18 godina 24

6. Aparati ortoze za donje ekstremitete

- b) abdukcione gaćice po Grafu, 6-8 sedmica
- c) ortoza za korekciju stopala (AFO)
jednodjelna-noćna,
- d) ortoza za korekciju stopala (AFO)
dvodjelna sa zglibom,
- e) Peronealni aparat:
 - 1) jednodjelni od plastike,
 - 2) dvodjelni sa zglibom,
- f) ortoza za koljeno (plastična sa zglibom),
- g) Hessingov aparat.

Rok trajanja:

- a) za lica do navršenih 7 godina 10
- b) 18 godina 12
- c) lica od 18-26 godina 24
- d) za lica preko 26 godina 36

Aparat za donje ekstremitete dobija osigurano lice kome su potrebni radi omogućavanja oslonca, sprečavanja nastupanja deformiteta, korigovanja postojećeg deformiteta i kontrolisanja nevoljnih pokreta.

Indikacije: motorna slabost dijela ili cijelog ekstremiteta zbog oštećenja neuro-mišićnog sistema, koji dovode do teške funkcionalne redukcije.

Navedena pomagala mogu u navedenim slučajevima značajno poboljšati funkcionalnu sposobnost za svakodnevne aktivnosti i rad.

7. Štake 24

- a) metalne - odlaktne,
- b) metalne - potpazušne.

Štake se obezbjeđuju, ako se tim pomagalom omogućuje ili poboljšava kretanje (stajanje i hod).

8. Štap četverouporišni 36

9. Hodalica trajno

Indikacije za tač. 8 i 9: teški funkcionalni poremećaji kretanja uzrokovanih neuro-mišićnim poremećajem ili oštećenjem zglobova težeg stepena.

10. Trapez za krevet trajno

Indikacije: hemiplegija i paraplegija

11. Antidekubitus jastuk 36

a) zračni jastuk za sjedenje za paraplegiju, kvadriplegiju

12. Antidekubitus madrac 36

Indikacije: nepokretne osobe, stalno vezane za krevet (kvadriplegija)

13. Sanitarna pomagala trajno

- a) sjedalo za kadu,
- b) nastavak za toaletnu šolju,
- c) zidni držač - rukohvat
- d) toaletna stolica

Indikacije: teško funkcionalno onesposobljenje:

- a) paraplegija,
- b) hemiplegija
- c) teški deformiteti kukova i koljena

Osiguranom licu kojem se odobri toaletna stolica, ne mogu se, u pravilu, odobriti i pelene.

14. Invalidska kolica na mehanički pogon

(1) Osigurana lica imaju pravo na invalidska kolica od navršene 3 godine života na sljedeće vrste kolica:

a) invalidska kolica standardne izrade (sobna)
za lica niskog stepena aktivnosti (djecu i odrasle) 48

(2) Pod pojmom lica sa niskim stepenom aktivnosti podrazumijeva se lice koje u savladavanju svakodnevnih aktivnosti ovisi o pomoći druge osobe, treba pomoć pri vožnji u kolicima i savladavanju arhitektonskih barijera.

- a) invalidska kolica za lica sa visokim stepenom aktivnosti (za djecu i odrasle) 36

Pod pojmom lica sa visokim stepenom aktivnosti podrazumijeva se lice djelomično onesposobljeno, ali koje je u tolikom stepenu rehabilitovano da potpuno samostalno savladava svoje svakodnevne aktivnosti, što uključuje potpuno samostalnu vožnju u kolicima.

Osiguranom licu koje prema kliničkom statusu i stepenu onesposobljenosti ne može koristiti standardna invalidska kolica, mogu se na prijedlog ovlaštenog ljekara, odobriti invalidska kolica sa neophodnim dodacima, cijeneći specifične potrebe svakog od ovih lica, a na osnovu odluke komisije Zavoda.

Osiguranom licu, korisniku invalidskih kolica se obezbjeđuju i rezervni dijelovi za invalidska kolica:

- a) gume vanjske (velike i male) - par 12
b) gume unutrašnje (velike i male) - par 12
c) kočnice - par 12

Indikacije:

- a) paraplegija, kvadriplegija, triplegija
b) kompletna ili teška uzetost donjih ekstremiteta, ili ako i pored aparata, veći dio vremena osigurano lice provodi u kolicima,
c) kompletna istostrana oduzetost ruke i noge, a osposobljavanje za stajanje nije indicirano iz drugih medicinskih razloga
d) teški deformirajući upalni procesi na velikim zglobovima donjih ekstremiteta usljed čega mu je kretanje potpuno onemogućeno (III i IV funkcionalni stadij),
e) amputacija jedne noge, a zbog oboljenja ili posljedica povrede druge noge, onemogućeno kretanje uz pomoć štaka ili nije moguće uraditi protetisanje amputirane noge,
f) amputacija obje noge iznad skočnog zgloba bez obzira na korištenje proteza.

15. ORTOZE: (Mideri i korzeti)

- a) za vratnu kičmu:
1) meka
2) tvrda

Rok trajanja:

- a) za lica do 18 godine po potrebi u odnosu na rast

b) za lica preko 18 godine 36

Indikacije:

- a) Ortoze za kičmu/kralježnicu (meka) propisuje se kod:
 - 1) bolova u vratnom dijelu kičme ili sa propagacijom niz ruku,
 - 2) stanja kod stabilnih preloma.
- b) Ortoza - tvrda propisuje se kod:
 - 1) subluksacije vratnog pršljena, sa neurološkim deficitom
 - 2) osteoporoze sa patološkom frakturom
 - 3) konzervativnog tretmana diskushernije
 - 4) malignog procesa vratnih pršljenova/kralježaka

16. Mider elastični sa metalnim ili plastičnim pojačanjem 24

Indikacije:

- 1) diskushernija sa neurološkim deficitom
- 2) stabilna spondilolisteza
- 3) bolna stanja nakon frakture lumbalnog pršljena

17. Visoka ortoza za trup za deformaciju ili rasterećenje kičme plastična - THL

Rok trajanja:

- a) za lica do 18 godina 12
- b) za lica preko 18 godina 36

Indikacije:

- a) stabilna spondilolisteza
- b) frakture torokalnih pršljenova
- c) upalni procesi

18. TLSO - Ortoza za grudnu kičmu/kralježnicu

Rok trajanja:

- a) za lica do 12 godina 8
- b) za lica od 12-18 godina 12

Indikacije:

- a) dupla skolioza Th/L preko 20 po Cobu
- b) djelimična kifoza Th/L preko 50 po Cobu

19. Trouporišna ortoza - Ortoze za grudnu kičmu/kralježnicu 36

Indikacije:

- a) spondilolisteza Th/L prelaza
- b) stanje poslije preloma pršljena u Th/L segmentima
- c) maligna oboljenja (koštane metastaze)
- d) osteoporoza sa patološkim frakturama
- e) upalni procesi na koštanom sistemu
- f) stanje nakon operativnog zahvata torakolumbalne kičme

20. Ortopedske cipele (par) 12

- a) po gipsanom modelu (jednostrano) - antivarus cipele
- b) po gipsanom modelu (obostrano)
- c) sa povišenjem:
- d) djeca do 15 godina preko 2 cm
- e) odrasli preko 3 cm

Indikacije:

- 1) ako je neophodno da ortopedsko pomagalo bude u spoju sa obućom;
- 2) potrebno vještačko stopalo ili dio stopala;
- 3) urođeni ili stečeni deformiteti koji remete funkcionalne aktivnosti,

4) odsječen dio nožja ili donožja, a osigurano lice ne koristi ortopedsko sredstvo;

Ortopedska obuća se izrađuje od standardne kože u obliku koji je prilagođen obliku stopala kad je opterećeno.

21. Ortopedski ulošci (par) za djecu od 3 do 12 godina 12

Indikacije:

Osigurano lice ima pravo na individualno izrađene ortopedske uloške u slučaju urođenih ili stečenih deformiteta koji remete funkcionalne aktivnosti.

22. USB za djecu od 4-8 godina 12

Indikacije:

izrazita averzija kalkaneusa

23. Štap za slijepa lica 12

Štap za slijepa lica obezbjeđuje se, ako se tim pomagalom omogućuje ili poboljšava kretanje, stajanje i hod.

24. Zaštitne naočale za slijepa lica 48

25. Toplomjer za slijepa lica - 1 kom. 60

26. Korekciona stakla - par

a) za djecu do 7 godina 12

b) za redovne učenike do 18 godina 24

c) za redovne studente do 26 godina 36

27. Korekciono staklo - prizma folija po oku po potrebi

Indikacije za tač. 26. i 27.:

Korekciona stakla obezbjeđuju se osiguranom licu u slučaju hipermetropije i miopije.

Korekciona stakla mogu se osiguranom licu obezbijediti i prije isteka utvrđenog roka trajanja za ovo pomagalo, ako doktor medicine - specijalista za očne bolesti utvrdi potrebu za promjenom stakla zbog promjene dioptrije za više od 0,5 dioptrije.

Korekciona stakla - prizma folija obezbjeđuje se osiguranim licima do navršenih 15 godina života u slučajevima:

poremećaja pokretljivosti (motiliteta) očne jabučice,
krivovratost (torticolis),
nistagmusa.

28. Standardni celuloidni armirani okviri za naočale

- a) za djecu do 7 godina 12
- b) za redovne učenike do 18 godina 24
- c) za redovne studente do 26 godina 36

29. Aparat za pojačanje sluha:

- a) za lica do 15 godina 36
- b) za lica od 15 do 65 godina 48
- c) za lica preko 65 godina trajno

Slušni aparat obezbjeđuje se osiguranom licu sa ukupanim gubitkom sluha po F.S. više od 60%. Slušni aparat se ne obezbjeđuje djeci do 6 mjeseci starosti i potpuno gluhim licima.

Slušni aparat za djecu do 15 godina starosti se na osnovu date indikacije, obezbjeđuje obostrano, pod uvjetom da postoji urođeno obostrano oštećenje sluha.

Slušni aparat se obezbjeđuje osiguranom licu na osnovu nalaza i mišljenja doktora medicine - specijaliste audiologa odnosno specijaliste za bolesti uha, grla i nosa koji ima mogućnost da vokalnim i tonalnim audiološkim ispitivanjem, kao i stručnim testiranjem karakteristika amplifikatora, odredi rehabilitacioni efekat, osigura rehabilitacioni postupak i na osnovu toga utvrdi potrebu dodjeljivanja aparata određenih elektroakustičnih karakteristika koje će najbolje odgovarati u datom slučaju oštećenja sluha. Osiguranom licu se obezbjeđuje standardni slušni aparat.

Ako osigurano lice zahtijeva da mu se dodijeli slušni aparat drugog oblika (ugrađen u naočale, naušnice, šnal i sl.), Zavod snosi troškove do visine cijene standardnog pomagala utvrđenog u ovoj tački Uredbe.

30. Aparat za omogućavanje glasnog govora trajno

Indikacije:

Aparat za omogućavanje glasnog govora obezbjeđuje se osiguranom licu koje je trajno izgubilo moć govora ako se testiranjem utvrdi da se pomoću takvog aparata može postići zadovoljavajući rehabilitacioni efekat, a učenje ezofagealnog govora nije dalo zadovoljavajući rezultat.

31. Govorna proteza 6

Indikacije:

Govorna proteza za omogućavanje glasnog govora obezbjeđuje se osiguranom licu koje je trajno izgubilo moć govora ako se testiranjem utvrdi da se pomoću takvog pomagala može postići zadovoljavajući rehabilitacioni efekat, a učenje ezofagealnog govora nije dalo zadovoljavajući rezultat.

Osigurano lice koje je ostvarilo pravo na govornu protezu ne može istovremeno ostvariti pravo na aparat za omogućavanje glasnog govora, osim u slučaju kada iz medicinsko-tehničkih razloga ne može koristiti već odobrenu govornu protezu.

32. Parcijalna zubna proteza 36

33. Totalna zubna proteza 60

34. Ortodontski aparat za lica do 18 godina 12

- a) pokretni aparat za jednu vilicu
- b) pokretni aparat za obje vilice u bloku
- c) fiksni ortodontski aparat

Indikacije za fiksni ortodontski aparat:

teške anomalije koje uzrokuju funkcionalne smetnje

35. Pen za inzulin 24

Prema medicinskoj indikaciji kada se daju dvije vrste inzulina odobravaju se dva pena.

36. Plastične šprice za jednokratnu upotrebu za davanje inzulina prema broju primanja inzulina

37. Aparat za mjerenje šećera u krvi trajno

Aparat za mjerenje šećera u krvi osigurava se isključivo inzuloovisnim licima.

38. Trake za mjerenje šećera u krvi - senzori

- a) inzuloovisna djeca, redovni studenti
do 26 godina i trudnice, 50 kom. mjesečno
- b) odrasli inzuloovisni 50 kom. za 50 dana

39. Kese za urostomu sa podlogom 30 kom. kesa mjesečno 10 podloga mjesečno

- 40. **Kese za urin sa ispustom** 15 kom. mjesečno
- 41. **Urin-vrećice uz nogu (750ml)** 15 kom. mjesečno
- 42. **Kese za urin sa ispustom 2 litra** 15 kom. mjesečno
- 43. **Urinar (kondom)** 30 kom. mjesečno

Indikacije za tač. 39-43

Pomagala iz navedenih tačaka se obezbjeđuju, ako se savremenim metodama liječenja ne može regulisati valjano pražnjenje mokraćne bešike odnosno u slučaju kad se pražnjenje mokraćne bešike nakon operativnog zahvata vrši preko vještačkog otvora na trbušnom zidu (urino stoma).

- 44. **Kese za ileostomu sa podlogom** 30 kom. mjesečno
10 podloga mjesečno

Indikacije:

Kese za ileostomu sa podlogom obezbjeđuju se ako se pražnjenje vrši preko vještačkog otvora na trbušnom zidu.

- 45. **Kese za kolostomu sa podlogom** 30 kom. mjesečno
10 podloga mjesečno

Indikacije:

Kese za kolostomu sa podlogom se obezbjeđuju ako se pražnjenje stolice vrši preko trbušnog zida.

- 46. **Stalni Foley kateter** 2 kom. mjesečno

Indikacije:

Stalni foley kateter obezbjeđuje se osiguranom licu ako je pražnjenje mokraćne bešike trajno nemoguće putem slobodne drenaže.

- 47. **Jednokratni kateter za samokateterizaciju** do 150 kom. mjesečno

Uz jednokratni kateter se obezbjeđuje:

- a) sterilne rukavice do 150 kom. mjesečno
- b) sprej za kateterizaciju 2 kom. mjesečno

Indikacije:

Jednokratni kateter obezbjeđuje se osiguranom licu koje ne kontroliše sfinkter, nakon što se urodinamskim ispitivanjem utvrdi da je neophodna intermitentna kateterizacija.

Osigurano lice koje koristi jednokratne katetere nema pravo na stalni Foley kateter i obratno.

48. Pelene za inkontinenciju 90 kom. mjesečno**Indikacije:**

Osigurana lica starija od 3 godine imaju pravo na pelene u slučaju:

- a) urođenih mana ili bolesti urogenitalnog i probavnog sistema koje imaju za trajnu posljedicu inkontinenciju urina ili stolice
- b) bolesti i povrede nervnog sistema koje imaju za trajnu posljedicu inkontinenciju urina ili stolice
- c) bolesti i povrede organa male zdjelice koje imaju za trajnu posljedicu inkontinenciju urina ili stolice
- d) mentalna retardacija koja za posljedicu ima trajnu inkontinenciju urina ili stolice

49. Endotrahealna kanila sa dva uloška trajno**Indikacije:**

Endotrahealna kanila obezbjeđuje se osiguranom licu kod izvršene traheotomije.

50. Funkcionalna proteza po dojci-silikonska 18**Indikacije:**

Odobrava se osiguranom licu kojem je izvršena amputacija dojke.

51. Specijalni grudnjak uz protezu dojke - 2 kom. 18**52. Inzulinska pumpa trajno**

Osigurana lica - djeca do 18 godina, inzuloovisnici, na prijedlog tima za inzulinske pumpe pedijatrijske klinike, a uz odobrenje komisije Zavoda, mogu ostvariti pravo na inzulinsku pumpu.

Uz inzulinsku pumpu obezbjeđuje se potrošni materijal:

- a) sistem za infuziju (igle i kateteri) 10 kom. mjesečno
- b) spremnik za inzulin 10 kom. mjesečno

c) baterije (pakovanje sa 9 komada) 5 pak. godišnje

IV. LISTA MEDICINSKIH POMAGALA KOJA SE OSIGURAVAJU PRI OPERATIVNIM ZAHVATIMA

Član 24.

Vrste pomagala kod operativnih zahvata

(1) Osiguranim licima, po osnovu obaveznog zdravstvenog osiguranja, pri operativnim zahvatima osiguravaju se, u medicinski indiciranim slučajevima, sljedeća medicinska pomagala:

Red.		Rok korištenja
br.	Naziv pomagala	u mjesecima

1. Endoproteze

- a) standardna cementna totalna proteza za kuk trajno
- b) proteza za koljeno ili rame trajno
- c) endoproteza lakta trajno
- d) parcijalna proteza kuka trajno

Standardna cementna totalna endoproteza za kuk, koljeno i rame obezbjeđuje se osiguranom licu kod kojeg je neophodna ugradnja iste u slučaju artroze zgloba, reumatoidnog artritisa, posttraumatskih stanja i kongenitalnih anomalija zgloba.

2. Očne proteze

- a) za lica do 18 godina 12
- b) za lica od 18 do 26 36
- c) za lica preko 26 godina 48

Očna proteza obezbjeđuje se osiguranom licu u slučaju gubitka oka i to:

- a) puna obična, u slučaju anoftalmosa,
- b) ljuspasta u slučaju djelimičnog odstranjenja oka ili atrofije očne jabučice.

Ako standardni oblik i veličina očne proteze ne odgovara obliku ili veličini konjukvitalne vrećice, izrađuje se očna proteza po mjeri.

3. Kohlearni implantat trajno

Indikacije:

Kohlearni implantat se obezbeđuje za djecu sa urođenim ili stečenim gubitkom sluha, starosne dobi od 1-7 godina.

4. Vaskularna proteza za krvne sudove

- a) bifurkacione trajno
- b) jednocjevne trajno

5. Pacemaker trajno

Indikacije:

Poremećaji srčanog ritma, prema kliničkim indikacijama.

6. Baterija za pacemaker (zamjena) trajno

Baterija za pacemaker odobrava se osiguranom licu kojem je ugrađen pacemaker, a neophodna je zamjena iste po prijedlogu liječnika specijaliste.

7. Hilon trajno

8. Intraokularna leća

prednja komora trajno

zadnja komora trajno

U medicinski indiciranim slučajevima može se odobriti savitljiva leća za zadnju komoru.

Indikacije:

Intraokularna leća i hilon obezbeđuju se osiguranom licu kod operacije oka.

9. Okrugli stapler prema medicinskim indikacijama

Indikacije:

- a) niska resekcija rektuma
- b) gastrotomija
- c) ezofagotomija
- d) resekcija želuca

10. Mrežica za plastiku
trbušnog zida prema medicinskim indikacijama

Indikacije: trbušna hernia i defekti trbušnog zida (kod operativnih zahvata)

11. Arteriovenski graft prema medicinskim indikacijama **Indikacije:** ugrađuje se kad se ne može napraviti nativna arteriovenska fistula

V. PRAVO NA POPRAVAK POMAGALA

Član 25.

Način korištenja pomagala

(1) Korisnik pomagala, odnosno stomatološko-protetskog sredstva, dužan je u periodu do isteka roka korištenja utvrđenog ovom Uredbom, da ga savjesno koristi i održava.

Član 26.

Popravak pomagala

(1) Osigurano lice ima pravo na popravak pomagala na teret sredstava Zavoda samo nakon isteka garantnog roka koji daje odabrani dobavljač.

(2) U toku korištenja pomagala, a nakon isteka garantnog roka, osiguranom licu se može odobriti popravka pomagala, s tim da se rok korištenja pomagala utvrđen u članu 23. Uredbe produžava za jednu četvrtinu vremena predviđenog ovom uredbom za njegovo trajanje. Cijena popravke pomagala ne može iznositi više od 25% ugovorene cijene sa odabranim dobavljačem pomagala.

(3) Potrebu za popravku pomagala iz medicinskih razloga utvrđuje ovlašteni ljekar, a potrebu popravke iz tehničkih razloga, na zahtjev osiguranog lica, utvrđuje odabrani dobavljač, koji sastavlja specifikaciju dijelova koje treba popraviti i predračun troškova popravke, a istu odobrava Zavod.

(4) Pravo na popravak nema osigurano lice ukoliko je potreba za popravkom uslovljena neadekvatnim održavanjem i upotrebom pomagala.

Član 27.

(1) Nakon isteka roka utvrđenog u članu 23. ove Uredbe, utvrđuje se potreba za novim pomagalom i vrši se zamjena pomagala.

(2) Na zahtjev korisnika može se izvršiti opravka pomagala radi njegovog korištenja i nakon isteka roka trajanja iz člana 23. ove Uredbe pod uslovom da se opravkom ovo pomagalo može koristiti najmanje jednu četvrtinu vremena predviđenog ovom Uredbom za njegovo trajanje, s tim da cijena popravke može iznositi do 25% cijene nabavke novog pomagala utvrđene u ovoj Uredbi.

Član 28.
Obaveza dobavljača pomagala

(1) Popravku pomagala vrši odabrani dobavljač sa kojim je Zavod zaključio ugovor o nabavci predmetnog pomagala.

VI. NAKNADA ŠTETE

Član 29.
Naknada štete

(1) Zavod ima pravo tražiti naknadu štete od ovlaštenog ljekara i zdravstvene ustanove u kojoj je zaposlen ukoliko se utvrdi da su propisali pomagalo suprotno odredbama ove uredbe.

(2) Zavod ima pravo tražiti naknadu štete od odabranog dobavljača ukoliko se utvrdi da je osiguranom licu isporučio pomagalo neodgovarajućeg kvaliteta, isporučio pomagalo izvan ugovorenog roka ili ako je osiguranom licu neopravdano naplatio dio cijene ili ukupnu cijenu isporučenog pomagala.

(3) Zavod ima pravo tražiti naknadu štete od osiguranog lica, ako se utvrdi da isto nije preuzelo ispravno izrađeno pomagalo, iz neopravanih razloga onemogućilo izradu naručenog pomagala po mjeri, namjerno uništilo pomagalo, odnosno isto nije vratilo pomagalo po isteku roka korištenja za ona pomagala za koja je utvrđena obaveza vraćanja Zavodu.

(4) Odštetni zahtjev utvrđuje se najmanje u visini vrijednosti pomagala koju je Zavod platio.

Član 30.
Raskid ugovora sa dobavljačem pomagala

(1) Zavod može jednostrano raskinuti ugovor sa odabranim dobavljačem, ukoliko je isporučio pomagalo suprotno odredbama ove Uredbe i sklopljenog ugovora.

VII. PRIJELAZNE I ZAVRŠNE ODREDBE

Član 31.
Korištenje pomagala u prelaznom periodu

(1) Osigurana lica koja na dan stupanja na snagu ove Uredbe koriste pomagala odnosno stomatološko-protetska sredstva, ili kojima je započeta izrada tih sredstava po odredbama Uredbe o obimu prava osiguranih lica na korišćenje ortopedskih i drugih pomagala, endoproteza, stomatološko-protetske pomoći i stomatološko-protetskih nadomjestaka ("Službene novine Kantona Sarajevo", broj 13/04), koristit će ta pomagala odnosno stomatološko-protetska sredstva pod uvjetima i sa rokovima trajanja određenim ovom Uredbom.

Član 32.
Učešće Zavoda u cijeni pomagala

(1) U prijelaznom periodu, do pravosnažnosti odluka o izboru najpovoljnijih dobavljača za nabavku ortopedskih pomagala, kao i za ona pomagala koja nisu predmet tenderske procedure, primjenjivat će se iznos učešća Zavoda u nabavci pomagala utvrđen Uredbom o obimu prava osiguranih lica na korišćenje ortopedskih i drugih pomagala, endoproteza, stomatološko-protetske pomoći i stomatološko-protetskih nadomjestaka ("Službene novine Kantona Sarajevo", broj 13/04).

(2) Za pomagala koja su ovom Uredbom uvrštena na listu kao nova prava osiguranih lica, u prijelaznom periodu, do okončanja postupka izbora dobavljača, iznos učešća Zavoda bit će utvrđen odlukom Upravnog odbora Zavoda.

Član 33.
Prestanak važenja Uredbe

(1) Danom stupanja na snagu ove Uredbe prestaje da važi Uredba o obimu prava osiguranih lica na korišćenje ortopedskih i drugih pomagala, endoproteza, stomatološko-protetske pomoći i stomatološko-protetskih nadomjestaka ("Službene novine Kantona Sarajevo", broj 13/04), osim u dijelu propisanom u članu 32. stav (1) ove Uredbe.

Član 34.

Ovlašćuje se Zavod da u roku od 60 dana od dana stupanja na snagu ove Uredbe reguliše način i postupak ostvarivanja prava propisanih ovom Uredbom.

Član 35.
Stupanje na snagu i primjena Uredbe

Ova Uredba stupa na snagu osmog dana od dana objavljivanja u "Službenim novinama Kantona Sarajevo", a primjenjuje se od 1. januara 2008. godine.

Broj 02-05-28137-4/07
22. novembra 2007. godine
Sarajevo

Premijer
Samir Silajdžić, s. r